



KNOCHESTAMPFER WAGGIS

sit 1972

## S ney Affehuus – 15 Waggis im Zolli

Uss em neye Affehuus  
luege mir zum Fänschter uus  
fyr aimool sinn m i r die wo gaffe  
und was mer gseen – sinn lutter Affe !  
Jä, Wenn me so do oobe stoot  
und an sich verby goo loot  
no wirds aim glaar, by däm wo goot  
hoggsch als Mensch – und wirsch nit rot  
mit em Aff im glyche Boot  
Ehrlig: zum go Affe z'bschaue  
muesch's drum nimm in Zolli haue  
en Affehuus – ganz im Verdraue  
kenntsich grad fyr alli zämme baue !  
denn Basel isch – mit Maa und Muus  
scho lang – ai ainzig Affehuus !

Bischpill wär – als Huus fyr Affe  
s'Roothuus wirgglig grad wie gschaffe  
aber die wo drinn hogge, hänn d'Chance vergää:  
so blöd dien sich nit emool Affe benää ...  
Gnueg Blatz fyr d'Affe hätt me–n–au gfunde  
und erscht no vyyll Rueh – in dr Stüggi unde  
Aber dangg em Matthias Eckestai  
sinn die Viecher jetz denn feudal dehai  
28 Millione – e Rieseprojjagd  
uss dr Portokasse – das hett gfäggt  
fyr s'Casino het dä gueti Maa  
synerzyt nyt ybrig kha  
är findet's hald – im Gegedail  
zum Affehuus – nit affegail  
Damit me das mit däm Bau ka byygle  
muess me zerscht die Viecher zyygle  
und das erinneret aim kolossal  
an Bärn – bym Nationalrootssaal  
hett me domools s'Zyygle au miessen iebe  
und die Affebandi ummeschiebe  
mit aim Unterschied , s'gilt z'prezisiere:  
sälli het me nit miesse narkotisiere ...  
Bis s Affehuus stoot, wärde d Affe verschoobe  
e Dail in d Novartis – e Dail zue de Schwoobe  
Zwoor maint dr Vasella s'läng em nooni  
z yyberlääbe, so ganz ooni Booni  
trotzdäm gäbs aber au no Sache  
wo n är berait syg, gratis z mache  
drum bsuecht är d Schimpansen und d Gorilla  
dääglic in dr Novartis-Villa  
goot immer an Keefig zuenene aane  
und schänggd jedem vo sym Lohn e Banaane

D Orang-Utan drgeege haues flott  
nach Gelsenkirchen in Kohlepott  
si däte dert schiints – das muess me sich mergge  
Schalke 04 bym Schutte verstergge

Zwysche Mensch und Aff kasch ohni Mieh  
wie me waiss, gwyssi Parallele zieh  
drum bruuchsch's au nit als Witz verschyyche  
unsre Stapi mitemen Aff z verglyche  
was haisst mit aim ? y bi so frei  
und zitier do grad die beriehmte drei:  
ain seet nyt – ain heert nyt – ain schwyggd in Rueh  
und das alles drifft gnau uf e Morin zue !  
Das findsch aber nit nur by uns lokal  
me kennt das au international:  
au bym Sarkozy und Berlusconi  
waiss me zum Bischpill immer nooni  
was denn aigentlic die baide  
vomene Aff duet unterschaide ....  
Und im Baselbiet hetts grad e Wald voll Affe  
die hänn jo schynts schwyzwyt am maischte Waffe  
drfyr kai Gäld me – jetz wirds glatt  
jetz blaane sy dängg e Raubzug in d Stadt  
und sehsch, fyr das hämmir doch persee  
die neyi britisch Söldnerarmee –

und wenn die nit länggd, mien nundefaane  
 hald die alte Stadtmuure wieder aane  
 Au wenn als d Medie yberborde  
 dänggsch sofort an en Affehorde  
 und vo dr BAZ ihrem Affetheater  
 griegsch zerscht emool e Muskelkater  
 aber bletzlig stoot denn dr Moritz doo  
 isch als neye Affewärter ko  
 het das Käsblatt ybernoo  
 het dr Stier by de Hörner paggd  
 und dr Blocher grad zum Deyfel gjaggd  
 vyllicht lauft in däm Affezwinger  
 jetz alles wieder e bitzli ringer  
 aber dodrfyr bruuchts nit nur Kohle ...  
 ... au gaischtig muess sich d BAZ erhoole.  
 Fascht wie imenen Affehuus  
 gseets im Joggeli als uus  
 s isch doch d' Muttenzerkurve, die tolli  
 grad wie dr Affefelse im Zolli  
 Und gosch im Theater d Aida go gaffe  
 no muesch sogar saage, nit emoll d Affe  
 wurde so verjääst uf d Byyhni ko  
 und so wie die dert d Sau abloo ...  
 und ebbis anders macht di au no grad baff:  
 an e Harasselauf – giengt nit emoll en Aff ...  
 und ebbis käm, y glaub y spinn  
 au nit im dümmschten Aff in Sinn  
 dass me Bääre, Luchs und Wölf wieder yyfiehre miesst  
 damit me sy nochhär by uns denn verschieest ...  
 Fasse mer jetz none weeneli zämme  
 wo mer ys sunscht no wie d Affe benämme:  
 Do schiggd men e Brunnen oder zwai  
 suubers Wasser nach Schanghai  
 und s dräggig süffemer denn dehai ...  
 Goot e Baiz in Basel druff  
 macht sy e Zircher wieder uff  
 Im Eglisee hänn d Wyyber Zoff  
 wägene baar so Fätze Stoff  
 E Bebbisagg voll Mischt und gruusig  
 isch Kunscht und koschtet zwanzigduusig  
 und lauft ebbis oobeduure nit rund  
 no verblaane sy's aifach im Untergrund  
 oder baue vo lutter Power  
 uf jede freie Blatz e Tower ...

Und d Moral vo dääre Gschicht  
 bisch als Mensch nimm ganz so dicht  
 mutiersch ganz langsam in däm Kaff  
 ohni's z'mergge – zrugg zum Aff  
 und keye's di denn zum Tämpel uus  
 no bisch au ryff – fyr s'Affehuus ...!

---

*D Ladäärne–Uusstellig uff em Minschterplatz  
 und d Waage– und Reggwisyte–Uusstellig bi dr Kasäärne  
 sin vom Määntig znacht bis am Mittwoch demoorge!  
 Deert und an de 3 Verkaufsständ (CINS) in dr Stadt  
 ka men au alli Zeedel und Schnitzelbängg, d Blaggedde  
 und dr Rädäbängg kaufe.*